

**Date – 10/02/2026**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. Mizoram Agricultural Marketing Board chuan tun kar chhung atana sawhthing man cheng 30-35 inkarah a bituk.
2. Ramchhung khawpui thenkhata BSNL ram, Mizoram tana hman theih te dapchhuaka hmala turin Mizoram Tourism Development Authority ruat a ni.
3. Nimin atang khan Parliament ah Union Budget 2026-27 sawiho tan a ni.
4. Prime Minister Narendra Modia chuan nimin khan Pariksha Pe Charcha vawi 9-naah zirlaite nen hun an hmang.

<><><>

### GINGER

Mizoram Agricultural Marketing Board (MAMB) chuan tun kar chhung atana sumdawngten kut hnathawktute sawhthing an leina man hniam ber tur a bituk thar a, rate thar hi cheng 30-35 inkarah a tlahniam a ni.

MAMB hotute chuan sawhthing rate thar ang hian kut hnathawktuten sawhthing an hralh theih an beisei thu an sawi.

Agriculture Minister kaihhruai MAMB hian kar kalta chhung atan sawhthing man chu cheng 40-45 inkarah a bituk a, mahse, sumdawng zingah sorkarin lei ngam an awm mumal loh avangin MAMB chuan tun kar chhung atan sawhthing man hi a bituk thar a, kar hmasaa sawhthing man aiin chawhrualin cheng 10 ang zelin SCC tinah a hniam a ni.

MAMB thukhawm hian sumdawngten sawhthing an leina tur zat sorkarin a bituk nan hian Siligury-a sawhthing man zat leh Siligury-a sawhthing phurh thlenna man zatte chu sorkarin a hmang ber a, kut hnathawktute tana hlawk tur siin a man hniam ber tur a bituk a ni. MAMB hian kumin atan district hrang hrangah sawhthing lei/hralhna hmun secondary collection centre (SCC) 64 a siam a; sorkar ruahman dan chuan SCC tina sumdawngten sawhthing an leina man hniam ber (reserved price/floor price) tur chu India ram hmun hrang hranga wholesale market (Mandi) rate enchungin kar tin emaw, a tul ang zelin a bituk dawn a ni.

**Kan Corr report lo ngaithla ang.**

*VC: Mizoram sorkar chuan tunkar chhung atana SCC 64-a sumdawngten sawhthing an leina man sang ber atan kg khat Rs 35 a ruahman a, a hniam ber chu kg khat Rs 30 a ni a; laboratory-a enfiah a nih hnua sawhthing quality tha leh chemical tel loa enkawl organic)-te chu a man a sang bik a, entry point -*

*Vairengte atanga SSC hlat zawng pawhin sawhthing manah hian nghawng a nei bawk.*

*Hetihlai hian MAMB hruaitute chuan tunlai hian sorkar rate anga hralh tuma Myanmar atanga sawhthing lalut an awm nia an hriat thu an sawi a; dik lo taka sum lakluh tum lo tura mitin nengin, ramri hnaiah chengte chu hetiang dik lo taka thil tih tumte thawhpui lo turin an ngen bakah, dik lo taka thil tite chu hrem an nih tur thu an sawi a ni.*

<><><>

## **FIRE PREVENTION WEEK**

State pumah nimin atang khan Kangmei Ven Hapta -Fire Prevention Week 2026 hman tan a ni a,

Environment, Forest & Climate Change Department bultuma huaihawt Kangmei Ven Hapta hi nimin khan Aizawlah khan EF&CC Minitier Pu Lalthansanga'n a hawng.

Kumin atana Kangmei Ven Hapta thupui chu 'Nungcha tinreng chenna leh tui thianghlim min petu ramngawte, kangmei lakah venghim rawh' tih niin nimin vek khan District hrang hrangah pawh Kangmei Ven Hapta hi hman tan a ni bawk.

Forest Minister chuan thu sawiin 'Kangmei Ven Hapta 2026' chu mipuite'n kangmei laka fimkhur nachang an hriat thar leh theuhna tur atan te, uar lehzuala invenna kalpui a nih theih nan tea hmalakna a nih thu a sawi a. 'Record-a tarlan a nih danin Mizoram chu engtiklai pawha ram kang/kangmei chhuah thut theihna hmun a nih avangin kumtluana kangmei laka fimkhur nachang hriat reng a ngai a ni a ti a. Kangmei laka ramngawte veng him tur leh sik leh sa inthlak danglam nasa lutuk tur veng turin mipuite'n zirtir nasat a ngaih thu sawiin, khawpuia chengte chu hma la hmasa tuah tang se a duh thu a sawi.

YMA leh Environmental NGO hrang hrangten ramngaw ven him kawnga an thawhpuiinaah lawmthu sawiin, hun lo awm leh zel turah pawh thawh hona tha tak neihpuiah a sawm nghal a; ramngaw ti chereu tam lo tura lo neih dan kalphung tha lehzual a awm theih nan te, hmasawna hna thawh leh environment humhalhte pawh inkhuangrual taka kalpui a nih theih nan, Forest Department chu Prohibitory ni lova Regulatory an nih thute sawiin, Department hrang hrangte nen pawh thawh hona tha tak neih zel a pawimawh thu a sawi a ni.

Kangmei Ven Hapta 2026 hi February ni 9 atanga ni 13 thleng neih tura ruahman a ni a, kangmei venna kawnga hma la thazual khaw pathumte hnenah lawmman pek an ni ang a, khaw dang ti tha pathumte hnenah consolation prize pek an ni bawk ang. Huan emaw, leipui emaw tur atana mimal ram vatte chuan March ni 5 ral hmain an hal tur a ni a, khawtlang theh ram neitute chuan March ni 15 ral hmain an lote chu an hal tur a ni. Lengpui leh a chhehvela lo hal turte chuan tlai lama thlawhtheihna thlawk chhuak leh tum hnuhnung ber hnu lamah chauh an hal tur a ni ang.

<><><>

CM

Ramchhung khawpui thenkhata BSNL ram, Mizoram tana hman theih te dapchhuaka hmala turin Mizoram Tourism Development Authority (MTDA) ruat a ni.

Nimin khan Chief Minister Pu Lalduhoma hovin hemi chungchangah hian meeting neih a ni a, Chgief Minister chuan BSNL Chairman leh Managing Director nen an lo sawidun tawh bawhzuiin hmalak dan tur hi an duang a, Mizoram Tourism Development Authority (MTDA) hian PMC atan Urban Infrastructure Management Services te open tender hmangin an thlang fel tawh a. PMC te hian BSNL m-in khawpui hrang hrang a ram hman tur an neihte an en kual mek a, tun dinhmunah Beltola, Guwahati leh Delhi-ah te hmunhma hi en tawh a ni.

Heng hmun te bakah hian Mumbai, Chennai, Vellore, Bengaluru, Kolkata, Hyderabad leh Shillong-ah te la zawn zel tur a ni a. Heng hmunhmate sorkarin a la chhawng a, sorkar mamawh ang building sa tur hian State sorkar sum sen ngai lova tih dan rawtna awmte sawiho a ni bawk.

Meetingah hian Tourism Minister Pu Lalnghinglova Hmar, GAD Principal Secretary Pu Sudhir Kumar, Commissioner & Secretary to CM Pu Vanlaldina Fanai, Tourism Director Pu R. Lalrodingi bakah Mizorama BSNL hotute leh official dangte an tel a ni.

<><><>

HOME MINISTER

Home Minister Pu K Sapdangan, Lengpui leh Sihphir ram Indian Air Force kuta hralh chungchangah inpuhna maksak taka puhtute leh puhte duh tlan dan angin CBI kutah a lut dawn ta a, sawi zui tur a awm tawh loah a ngai a ti.

Nimina Aizawla ZPM Office-a an party chhung inkhawmah thu sawiin Pu K Sapdanga chuan Lengpui leh Sihphir ram hralh chungchang hi CBI kuta a luh dawn tak avangin Aizawl Municipal Corporation inthlan tur thlir lawka hetiang thawm ring tak siam pawh hian awmzia a nei dawn ta lo a ni, a ti a ni.

Home Minister chuan, financial year tharah police 200 lak leh an tum thu sawiin thalaite lo inring se a ti.

A hmaa Police an lak dan ang bawkin dik takin an la leh dawn a ti a, kum 2021 atangin kum tin Police boral za chuang an awm thin a, kum tin mi 150 vel bawr pension an awm ziah bawk a. Post ruak 4,666 awm mek hnawh turin tunah hian training mek 250 an awm a, a ti.

Kum 2025 kha Police-te chuan fitness uar kumah an hmang a, kum 2026 hi discipline uar kumah an puang ve leh thung tih sawiin. Police-ah chuan posting duhna hmun dil a awm ve lova, a hun takah leh a hmun dik takah engkim tih vek tum a ni, a ti.

<><><>

LUNGLEI AGRI

Lunglei-ah Agriculture Technology Management Agency (ATMA) leh District Agriculture Office (DAO) Lunglei District țang kawp huaihawtin kut

**hna thawktute leh agriculture mi thiamte inkawm hona, "Farmers Scientist Interaction" hun nimin khan buatsaih a ni a. Mizoram sawrkara Agriculture & Farmers Welfare (A&FW) Director Pu Vanlalthlamuanan he hun hi a hmanpui.**

**Agriculture Director Pu Vanlalthlamuana chuan sawrkarin kut hna thawktute tan ruahmanna tha tak tak duangin, kut hnathawktute hmasawna tur a ngaihtuah reng tih sawiin, kut hna thawktute chu sawrkar ruahmannate chhawr tangkai thei tura inbuatsaih turin a chah a. Department mi thiamte rawn taima tur leh mi thiamte thurawn leh kaihhruaina ngai pawimawh tura chahin, an harsatnate chu dept-a thawktute hnenah thlen zung zung thin turin a chah bawk.**

**Agriculture Joint Director Pu C. Malsawmkima leh Deputy Director Pu K. Laltnamawia te pawhin hun hmanpuiin, Lunglei District chhunga khaw hrang hrang atangin kuthnathawktute an kal khawm a. Lunglei DAO Dr Samuel Lalliansanga'n hun kaihruiin, Krishi Vigyan Kendra (KVK) Lungleia Senior Scientist and Head Dr Henry Saplalrinliana chuan kut hna thawktute tana hriat tur pawimawh hrang hrang a zirtir a. Kut hna thawktute nen sawi hona hun hlawk tak hman a ni bawk.**

**Lungleia hun hman bakah hian Agriculture hotute chuan Haulawnga Huisih Zauvah lo neitute nen hun an hmang ho bawk.**

**<><><>**

**AIR NEWS ON SOCIAL MEDIA**

**Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinthar puan leh a ni ang.**

**<><><>**

**UNION BUDGET**

**Nimin atang khan Parliament ah Union Budget 2026-27 sawiho tan a ni a. Rajya Sabha-ah chuan Congress MP P Chidambarama'n sawrkar lakah zawhna siamin ram economy thanna nominal growth rate chu 2023-24 ah zaa 12 anih laia, 2024-25 ah zaa 9.8 tlahniam a, 2025-26 ah phei chuan zaa 8 ah a tlahniam chhan a zawt a. Hei bakah hian fiscal deficit 2025-26 chu zaa 4.4 a ni a, kum tharah zaa 4.3 ah chauh a tlahniam dawn tih sawiin revenue deficit pawh kuminah zaa 1.5 niin kumtharah pawh a ngai a ni dawn a ti a. Pu Chidambaram-a chuan revenue deficit hi ti tlem a, zaa 1 ah tihnam a ngaih thu a sawi lang a. Ramchhungah hna nei lo an tam thu sawiin mipui vaibelchhe 144 awm zingah mi nuai 195 chauh factory ah an thawk a, thil siamchhuah lam hi zaa 16 ah a tang rei tawh hle tih a sawi a. Hei bakah hian Union budget a sum dah dan sawiselin science, social welfare leh urban sector lamah sum dah tih tlem a ni a ti a. Scheme engemawzat puan ni mahse an puala sum dah erawh a tam lo hle a ti bawk.**

**BJP MP Arun Singh chuan Union Budget chu a hma aiin a let thumin a lian tih a sawi a. Cheng vaibelchhe nuai 53 lai a tling tih**

sawiin UPA sawrkar lain cheng vaibelchhe nuai 16 chauh anih thu a sawi a ni.

<><><>

#### PM PARIKSHA PE CHARCHA

Prime Minister Narendra Modia chuan nimin khan Pariksha Pe Charcha vawi 9-naah zirlaite nen hun an hmang. Vawiin khan PM Modia leh zirlaite inkawmhona video pahnihna hi tihchhuah niin exam laia zirlaite rilru hah leh hrehawmna hneh theih dan tur Pu Modia hian a zirtir a. Pu Modia chuan zirlaite chu exam piah lam hun thleng ngaihtuah pha tura chahin thiamthil, infiamna, thil thar siamchhuah leh mimal hmasawmna tur ngaihtuah thleng phak turin a fuih a ni.

<><><>

#### PARIKSHA PE CHARCHA

PM SHRI Kendriya Vidyalaya Aizawl Principal Jaibir Singh chuan Prime Minister Narendra Modi leh zirlaite inkawmna chuan zirlaite leh an nu leh pa te hmasawmna tam tak a pe tih sawiin an inkawmna chuan zirlaite hmasawmna kawngah nasa takin a pui tih a sawi.

Akashvani News Aizawl palai nen an inkawmna ah he thu hi sawiin Pu Jaibir Singh chuan an school PM SHRI Kendriya Vidyalaya Aizawl ah zirlaiten a hohovin Prime Minister Narendra Modi leh zirlai inkawmna February ni 6-a tihchhuah chu Live in an lo thlir a ti a, an zirlai 630 lain Live in an hmu thei tih sawiin a hmuna kal Lalthlamuanpuii Pachuau, Class 7 zirlai chu an chhuang hle tih sawiin a kal ve lo te pawhin Live an en atangin hmasawmna tam tak an hmu thei tih a sawi.

Principal sawi danin Pariksha Pe Charcha chu kum dangah pawh an lo hlawkpui tawh thin tih sawiin hei hian zirlaite mahni inrintawkna nasa tak a pe a ti a, hmasawmna tam tak a thlen tih a sawi.

<><><>